


冊府元龜

三百四十五之七


百四



漢書門			
三	一	五	九
〇	二	六	〇
冊	架	函	號

內閣文庫			
三	五	五	漢
〇	〇	三	書
架	冊	號	類

內閣文庫			
番號	漢	5345	
冊數	300 (104)		
函號	365	6	



游所五遊

淮南李嗣京祭服

西極文和風訂正

陳章黃四著發釋

將師節 六

佳命第六

陳世僧明字仕相廣陵人策天四甲典蜀文有...
廣州南江管法廣安典著與俱行後安與死高...
其安引為主師後景之忠隨高潮入...
其真改篇...
其真改篇...
其真改篇...

冊府元龜

淮南李嗣京參閱

西極文翔鳳訂正

豫章黃國琦較釋

將帥部 六

佐命第六

陳杜僧明字弘昭廣陵人梁大同中與周文育並爲
廣州南江督護盧安興啓與俱行後安興死高祖在
高安引爲主帥侯景之亂隨高祖入援京師高祖於
始興破蘭裕爲前鋒擒裕斬之又與蔡路養戰於南

冊府元龜

將帥部

卷之三十四

野僧明馬被傷高祖馳往救之以所乘馬授僧明僧明乘馬與數十人復進衆皆披靡因而乘之大敗路養高州刺史李遷仕又據大臯入贛石以逼高祖高祖遣周文育爲前軍與僧明擊走之遷仕與寧都人劉孝尙併力將襲南康高祖又令僧明與文育等拒之相持連戰百餘合卒擒遷仕送于高祖軍及高祖下南康留僧明頓西昌督安成廬陵二郡軍事梁元帝承制授假節陵野將軍新州刺史臨江縣子邑三百戶侯景遣于慶等寇南江高祖頓豫章命僧明爲前驅所向尅捷高祖表僧明爲長史仍隨東討軍至

蔡州僧明率麾下燒賊水門大艦及景平以功除員外散騎嘗侍明威將軍南兖州刺史進爵爲侯增邑并前五百戶仍領晉陵太守承聖二年從高祖北圍廣陵加使持節遷通直散騎嘗侍平北將軍餘如故荊州陷高祖使僧明率吳明徹等隨侯瑱西援于江州病卒

周文育字景德義興陽羨人也廣州監州王勸以爲長流令勸被代文育與勸俱下至大庾嶺文育辭勸勸遣之高祖時高祖在高要聞其還也大喜遣人迎之厚加賞賜分麾下配焉高祖之討侯景文育與杜

僧明爲前軍克蘭裕援歐陽頎皆有功高祖破蔡路
養于南野文育爲路養所圍四面數重矢石雨下所
乘馬死文育右手搏戰左手解鞍潰圍而出因與杜
僧明等相得兵力復進遂大敗之高祖乃表文育爲
府司馬李遷仕之據大臯遣其將杜平虜入贛石魚
梁作城高祖命文育擊之平虜棄城走文育據其城
遷仕聞平虜敗留老弱於大臯悉選精兵自將以攻
文育其鋒甚銳軍人憚之文育與戰遷仕稍却相持
未解會高祖遣杜僧明來援別破遷仕水軍遷仕衆
潰不敢過大臯直走新淦梁元帝授文育假節雄信

將軍義州刺史遷仕又與劉孝尚謀拒義軍高祖遣
文育與侯安都杜僧明徐度杜陵築城於白口拒之
文育頻出與戰遂擒遷仕高祖發自南康遣文育將
兵五千開通江路侯景將王伯醜據豫章文育擊走
之遂據其城累前後功除游騎將軍員外散騎嘗侍
封東遷縣侯邑五百戶高祖軍至白茅灣命文育與
杜僧明嘗爲軍鋒平南陵鵠頭城諸城及至姑熟與
景將侯子鑿戰破之景平授通直散騎嘗侍改封南
移縣侯邑一千戶拜信義太守累遷南丹陽蘭陵晉
陵太守智武將軍散騎嘗侍高祖誅王僧辨命文育

督衆軍會世祖於吳興圍杜龕尅之又濟江襲會稽太守張彪得其郡城及世祖爲彪所襲文育時頓城北香巖寺世祖夜往趨之因共立柵頂之彪又來攻之文育悉力苦戰彪不能克旣破平彪高祖以侯瑱據江州命文育討之仍除都督南豫州諸軍事嚴威將軍南豫州刺史率兵襲湓城未尅徐嗣徽引齊寇渡江據蕪湖詔徵文育還京嗣徽等列艦於青墩至於七磯以斷文育歸路及夕文育鼓噪而發嗣徽等不能制至旦又攻嗣徽驍將鮑碎獨以小艦殿軍文育乘單解艇與戰跳入碎艦斬碎仍牽其艦而還賊

衆大駭因留船蕪湖自丹陽步上時高祖拒嗣徽於白城適與文育相會將戰風急高祖曰兵不逆風文育曰事急矣當決之何用古法抽槳上馬馳而進衆軍從之風亦尋轉殺傷數百人嗣徽等移營幕府山文育從頓對之頻戰功最加平西將軍進爵壽昌縣公并給鼓吹一部

侯安都字成師始興曲江人梁始興內史蕭子範辟爲主簿侯景之亂招集兵甲至三千人高祖援京邑安都引兵從高祖攻蔡路養破李遷仕尅平侯景竝力戰有功梁元帝授猛烈將軍通直散騎嘗侍富川

縣子邑三百戶隨高祖鎮京口除蘭陵太守高祖謀襲王僧辨諸將莫知者唯與安都定計仍使安都率水軍自京口趨石頭高祖自率馬步從江城羅落會之安都至石頭北棄舟登岸僧辨勿之覺也石頭城北接岡阜雉堞不甚危峻安都被甲帶長刀軍人捧之投于女垣內衆隨而入進逼僧辨臥室高祖大軍亦至與僧辨戰于廳事前安都自內閣出腹背擊之遂擒僧辨敬帝紹泰元年以功授使持節散騎嘗侍都督南徐州諸軍事仁威將軍南徐州刺史高祖東討杜龕安都留臺居守徐嗣徽任約等引齊寇入據

石頭安都與戰大敗之及高祖至以安都爲水軍于中流斷賊糧運又襲秦郡破嗣徽柵收其家口并馬驢輜重得嗣徽所彈琵琶及所養鷹遣信餉之曰昨至弟任處得此令以相還嗣徽等見之大懼尋而請和高祖聽其還北及嗣徽等濟江齊之餘軍猶據采石守備甚嚴又遣安都攻之多所俘獲及爲平南將軍都督水軍出豫章助豫州刺史周文育討蕭勃安都未至文育已斬勃并擒其將歐陽顥傅泰等唯余孝頃與勃子孜猶據豫章之石頭作兩城孝頃與孜各據其一又多設船艦夾水陣安都至乃銜枚夜燒

其艦文育率水軍安都領步騎登岸結陣孝頃俄斷後路安都乃令軍士多伐松木豎柵列營漸進頻戰屢尅孜乃降孝頃奔歸新吳請入子爲質許之師還以功進號鎮北將軍加開府儀同三司後爲都督南豫州諸軍事鎮西將軍南豫州刺史令繼周文育攻余孝勵及王琳將曹慶嘗衆愛等安都自宮亭湖出松門躡衆愛後文育爲熊曇朗所害安都廻取大艦值琳將周昭周協南歸與戰破之生擒昭協孝勵弟猷率部下四千家欲就王琳遇周昭敗乃詣安都又進軍於禽奇洲破曹慶等焚其船艦衆愛奔干廬山

爲村人所殺餘衆悉平

吳明徹字通昭秦郡人高祖鎮京口深相要結明徹乃詣高祖高祖爲之降階執手卽席與論當世之務明徹亦微涉書史經傳就汝南周弘正學天文孤虛遁甲略通其妙頗以英雄自許高祖深奇之梁元帝承聖二年授戎昭將軍安州刺史紹泰初隨周文育討杜龕張彪等東道平授使持節散騎嘗侍安東將軍南兖州刺史封安吳縣侯高祖受禪拜安南將軍胡穎字方秀吳興東遷人也其先寓居吳興土斷爲民穎偉姿容性寬厚梁世仕至武陵國侍郎東宮直

前出番禺征討任廣州西江都護高祖在廣州穎仍自結高祖高祖與其同郡接遇甚隆及南征交趾穎從行役餘諸將帥皆出其下及平李賁高祖旋師穎隸在西江出兵多以穎留守侯景之亂高祖尅元景仲仍度嶺援臺平蔡路養李遷仕穎皆有功歷平固遂興二縣令高祖進軍頓西昌以穎爲巴丘縣令鎮大臯督糧運下至豫章以穎監豫章郡高祖率衆與上僧辨會於白茅灣同討侯景以穎知留府事梁承聖初元帝授穎假節鐵騎將軍羅州刺史封漢陽縣侯邑五百戶尋除豫章內史隨高祖鎮京口齊遣郭

元建出關都督侯瑱率師禦之高祖選府內驍勇二千人配穎令隨瑱於東關大破之建元三年高祖圍廣陵齊人東方老據宿預請降以穎爲五原太守隨杜僧明援老不尅退還除曲阿令尋領馬軍從高祖襲王僧辨又隨周文育於吳興討杜龕梁敬帝紹泰元年除假節都督南豫州諸軍事輕車將軍南豫州刺史太平元年除持節散騎嘗侍仁威將軍尋兼丹陽尹高祖受禪兼左衛將軍餘如故
徐度字孝光安陸人也世居京師少儻不拘小節及長姿貌瓌偉嗜酒好博嘗使僮僕屠酤爲事梁始

興內史蕭介赴郡度從之將領士卒征諸山洞以驍
勇聞高祖征交趾厚禮招之度乃委質侯景之亂高
祖尅定廣州定蔡路養破李遷任計畫多出於度兼
統兵甲每戰有功歸至白茅灣梁元帝授寧朔將軍
合州刺史侯景平後追錄前後戰功加通直散騎嘗
侍封廣德縣侯邑五百戶遷散騎嘗侍高祖鎮朱方
除信武將軍蘭陵太守高祖遣衡陽獻王平荊州刺
史度率所領從焉江陵陷間行東歸高祖平王僧辨度與
侯安都爲水軍敬帝紹泰元年高祖東討杜龕奉敬
帝幸京口以度領宿衛并知留府事徐嗣徽任約等

來寇高祖與敬帝還都時賊已據石頭城市屢居民
竝在南路去臺遙遠恐爲賊所乘乃使度將兵鎮于
冶城寺築壘以斷之賊悉衆來攻不能尅高祖亦救
之尋大敗約等明年嗣徽等又引齊寇濟江度隨衆
軍破之于郊壇以功除信威將軍郢州刺史兼領吳
興太守尋遷右將軍領軍將軍徐州沿江諸軍事鎮北將
軍南徐州刺史給鼓吹一部

歐陽頎爲臨賀內史當侯景構逆高祖入援京邑將
至始興頎深自結託蘭裕遣兵攻頎高祖援之裕敗
高祖以王懷明爲衡州刺史遷頎爲始興內史高祖

之討蔡路養李遷仕也。顧率兵度嶺以助高祖。及養等平。顧有功。梁元帝承制以始興郡爲東衡州。以顧爲持節通直散騎嘗侍都督東衡州諸軍事雲麾將軍東衡州刺史新豐縣伯。邑四百戶。

北齊段榮五原人也。高祖建義山東。榮贊成大策。爲大行臺右丞西北道慰喻大使。巡方曉喻所在。下之高祖南討鄴。留榮鎮信都。仍授鎮北將軍定州刺史。時攻鄴未克。所領軍資榮轉輸無闕。高祖入雒。論功封姑臧縣侯。邑八百戶。

斛律金初從後魏。爾朱榮爲別將。頗有戰功。爲鎮南大將軍。及爾朱兆等逆亂。高祖密懷興復之計。金與婁胎庫狄干等贊成大謀。仍從舉義。高祖南攻鄴。留金守信都。領恒雲燕朔顯五州大都督。委以從事。別討李循。破之。加右光祿大夫。會高祖於鄴。仍從平晉陽。追滅爾朱兆。西魏武帝太昌初。爲汾州刺史。進爵爲侯。

孫騰初爲高祖晉州長史。及起義。信都騰以誠款。嘗預謀策。又以朝廷隔絕。號令無所歸。不權有所立。則衆將沮散。苦請於高祖。從之。遂立中興。主除侍中。尋加使持節六州流民大都督。北道大行臺。騰以高祖

腹心入居門下與斛斯椿同掌機密椿既生異端觸塗乖謬騰深見猜忌慮禍及已遂潛將十餘騎馳赴晉陽高祖入討斛斯椿留騰行并州事又使騰爲冀相殷定滄瀛幽安八州行臺僕射行冀州事復行相州事天平初入爲尚書左僕射內外之事騰咸知之兼司空尚書令時西魏遣將寇南交詔騰爲南道行臺率諸將討之騰性懦怯無威畧卽失利而還又除司徒遷太保騰早依高祖契闊艱危勤力恭儉深見信待及高祖置之魏朝寄以心腹東魏孝靜武定六年薨文宣天保初以騰佐命詔祭告其墓昭帝皇建

中配享高祖廟庭

王懷爲第一領民酋長高祖東出懷率其部人三千餘家隨高祖于冀州義旗建高祖以爲大都督從討爾朱兆于廣阿破之除安北將軍蔚州刺史又隨高祖攻鄴克之從破四胡于韓陵進爵爲侯仍從入雒拜車騎將軍又從高祖襲尅西夏州還爲大都督鎮下館除儀同三司

張保雒初仕後魏爲揚烈將軍奉車都尉後隸高祖爲都督從討步蕃及高祖起義保雒爲帳內從破爾朱兆於廣阿尋遷右將軍中散大夫仍以帳內從高

祖圍鄴城既拔除平南將軍光祿大夫從破爾朱兆
等于韓陵因隨高祖入雒加安東將軍從高祖破周
文帝於邙山圍玉璧攻龍門還留鎮晉州文襄嗣位
以保雒為左廂大都督

薛孤延為都督從高祖起義破爾朱兆於廣阿因從
平鄴以功轉大都督從破四胡於韓陵加金紫光祿
大夫從追爾朱兆於赤嶺除第一領民酋長累加
車騎將軍從征玉璧轉鎮州刺史從破周文帝於邙
山進爵為縣公又從高祖討破山胡西攻玉璧入為
左衛將軍改封平秦郡公延性好酒率多昏醉而以

勇決善戰每大軍征討嘗為前鋒故與彭劉韓潘同

列臣欽若等曰彭樂
劉貴韓軌潘樂

尉長命大安狄郡人性和厚有器識扶陽之亂寄居
太原及高祖將建大義長命參計策從高祖破四胡
於韓陵拜安南將軍樊子鵠據兗州反除東南道大
都督與諸軍討平之轉鎮范陽城就拜幽州刺史督
安平二州事

莫多婁貸文大安狄郡人也驍果有膽氣從高祖舉
義擊爾朱兆於廣阿又從破四胡於韓陵後從平爾
朱兆於赤嶺兆窮迫自經貸文獲其屍遷左廂大

都督

高昂字敖曹後魏末爲冀州刺史大都督率衆從高祖破爾朱兆于廣阿又隨高祖討兆於韓陵昂自領鄉人部曲王桃湯東方老呼延族等三千人高祖曰高都督純將漢兒恐不濟事今當割鮮卑兵千餘人共相參雜於意如何昂對曰敖曹所將部曲練習已久前後戰鬪不減鮮卑今若雜之情不相協勝則爭功退則推罪願自領漢軍不煩更配高祖然之及戰高祖小却兆等方乘之高岳韓匈奴等以五百騎衝其前斛律敦收散卒躡其後昂與蔡雋以千騎自栗

園出橫擊兆軍兆衆繇是大敗是日微昂等高祖幾殆尋加侍中開府進爵爲侯邑七百戶
韓軌字伯年大安狄郡人少有志操性深沉喜怒不形于色高祖鎮晉州引爲鎮城都督及起兵于信都軌贊成大策從破爾朱兆於廣阿又從破韓陵封平昌縣侯仍督中軍從破爾朱兆于赤嶽嶺
後周于謹自太祖初臨夏州爲防城大都督夏州長史及賀拔岳被害太祖赴平涼謹乃言于太祖曰魏祚陵遲權臣擅命羣盜蜂起黔首嗷然明公仗超世之資懷濟時之畧四方遠近咸所歸心願早建良圖

以副衆望太祖曰何以言之對曰關中秦漢舊都昔稱天府將士驍勇厥壤膏腴西有巴蜀之饒北有羊馬之利今若據其要害招集英雄養卒勸農足觀時變且天子在維逼迫羣兇若陳明公之懇誠筭時事之利害請都關右帝必喜而遷然後挾天子而令諸侯奉王命以討暴亂桓公之業千載一時也太祖大悅會有勅追謹爲門內大都督帝西遷從太祖征潼關破迴雒城授北雍州刺史進封藍田公後拜驃騎大將軍開府又從太祖拔弘農破沙苑又從戰河橋又從攻邙山

侯莫陳崇字尚樂武川人初爲建威將軍隨賀拔岳入關討万俟醜奴及岳被害崇與諸將同謀迎太祖從平侯莫陳悅累進驃騎大將軍開府從擒竇泰復弘農破沙苑從戰河橋崇功居多進位柱國六宮建拜大司空孝閔踐祚進封梁國公邑萬戶

獨孤信武川人與太祖鄉里少相友善後爲驃騎大將軍從太祖復弘農破沙苑以功除隴右十一州大都督

楊薦爲驃騎大將軍初太祖臨夏州補薦帳內都督及平侯莫陳悅使薦入雒請事魏孝武授太祖關西

大行臺仍除薦直閣將軍馮翊長公主嫠居孝武授
意欲歸詣太祖乃令武衛元毗喻旨薦歸白太祖又
遣薦入雒陽請之孝武即許焉孝武欲向關中薦贊
成其計孝武曰卿歸語行臺迎我太祖又遣薦與長
史宇文測出關候接孝武至長安進爵清水縣子
趙貴武川人初爲太祖司馬車騎大將軍從太祖復
弘農戰沙苑拜侍中驃騎大將軍開府又從戰河橋
又從拔玉壁又從戰邠山拜在國大將軍賜姓乙弗
氏

蔡祐字承先爲都督時太祖初臨夏州及侯莫陳悅

害賀拔岳諸將遣使迎太祖將赴之夏州首望彌姐
元進等陰有異計太祖微知之先與祐議執元進祐
曰狼子野心會當反噬今若執縛不如殺之太祖曰
汝大快也於是召元進等入計事太祖口隴賊逆亂
與諸人戮力討之觀諸人輩似有不同者太祖微以
此言動之因目祐祐即出外衣甲持刀人瞋目叱諸
人曰與人朝謀夕異豈是人也蔡祐今日必斬二人
之頭因按劍臨之舉坐皆叩頭曰願有簡擇祐乃坐
元進而斬之并其黨竝伏誅一坐皆戰慄莫敢仰視
於是與諸將結盟同心誅悅太祖以此知重之謂祐

曰吾今以爾爲子爾其父事我後從討悅破之又從迎魏孝武於潼關以前後功封長鄉縣伯邑五百戶李穆字顯慶風神警俊侷儻有奇節太祖首建義旗便委質釋褐統軍西魏武帝永熙末奉迎魏武帝授都督封永平縣子邑二百戶又領鄉兵累以軍功進爵爲伯從太祖擊齊師於邙山太祖臨陣墮馬穆突圍而進授以從騎潰圍俱出以故得免旣而與穆相對泣顧左右曰成我事者其此人乎

隋元胄數從周齊王憲征伐官至大將軍高祖被召人將受顧命先呼胄次命陶澄並委以心腹嘗宿臥內及爲丞相每典軍在禁中又引弟威等俱入侍衛周趙王招知高祖將遷周鼎乃要高祖就第趙王引高祖入寢室左右不得從唯楊弘與胄兄弟坐於戶側趙王謂其二子員貫曰汝當進瓜我因刺殺之及酒酣趙王欲生變以佩刀子刺瓜連啗高祖將爲不利胄進曰相府有事不可久留趙王呵之曰我與丞相言汝何爲者叱之使却胄瞋目憤氣抽刀入衛趙王問其姓名胄以實對趙王曰汝非昔事齊王者乎誠壯士也因賜之酒曰吾豈有不善之事意林卿何猜警如是趙王僞吐將入後閣胄恐其爲變扶令上

座如此者再三趙王稱喉乾命胄就厨取飲胄不動會滕王迥後至高祖降階迎之胄與高祖耳語曰事勢大異可速去高祖猶不悟謂曰彼無兵馬復何能為胄曰兵馬悉他家物一先下手大事便去胄不辭死何益耶高祖入座胄聞屋後披甲聲遽請曰相府事殷公何得如此因扶高祖下牀趨而去趙王將追之胄以身蔽戶王不得出高祖及門胄自後而至趙王恨不時發彈指出血及誅趙王賞賜不可勝計高祖受禪進位上柱國封武陵郡公邑三千戶拜左衛將軍尋遷右衛大將軍高祖從容曰保護朕躬成此

基業元胄功也

李圓通自高祖為相時為帥都督委以心膂圓通多力勁捷長於武用周氏諸王素憚高祖每伺高祖之隙圖為不利賴圓通獲免者數矣高祖深感之繇是參預政事

唐劉弘基在隋以父廕為右勳侍大業末亡命至大原會高祖鎮太原因自結託又察太宗有非嘗之度尤委心焉及太宗將圖義舉弘基遂募得二千人王威高君雅欲為變高祖伏弘基及長孫順德於廳事之後威雅既及弘基麾左右執之又從義師下西河

進攻霍邑隋將宋老生率衆陣於城外弘基從太宗擊之老生敗走棄馬投塹弘基麾下斬其首師至河東弘基以兵八千人先濟河進下馮翊爲渭北道大使得便宜從事殷開山爲副西畧地扶風有衆六萬南渡渭水屯于長安故城威聲大振耀軍金光門衛文昇遣兵來戰弘基逆擊走之擒甲士千餘人馬數百匹高祖大悅賜馬二十匹及平京城功第一從太宗擊薛舉于扶風破之追奔至隴山而反累拜右領都督封河間郡公又從太宗經畧東都戰于瓔珞澗外破之師旋弘基爲殿隋將段達張志陣于三玉陵

弘基擊敗之武德元年拜右驍衛大將軍以元謀之勳恕其一死又從太宗平夏縣進封任國公尋從擊劉黑闥于雒州師旋授并鉞將軍又以佐命功賜真食九百戶

盛彥卿隋末爲澄城長義師至汾陰率賓客千餘人濟河上謁高祖拜銀青光祿大夫行軍摠管從平京城俄與史萬寶鎮宐陽以拒東寇

盧士良瀛州刺史士叡之弟仕隋爲右親衛大業末見天下已亂不求仕進潛結英豪及義師西上與兄士叡同舉兵得百人來謁高祖於汾陰甚蒙接遇以

爲軍頭擊桑顯和于飲馬泉敗屈突通于潼關俱有戰功位在國下未詳錢九隴善騎射高祖信愛之嘗置左右義兵起以軍功授金紫光祿大夫及尅平城拜左監門郎將任瓌字瑋廬州合肥人隋仁壽中爲韓城尉俄又罷職及高祖討捕於汾晉瓌謁高祖於韓門承制爲河東縣戶曹高祖將之晉陽留隱太子建成以託於瓌義師起瓌至龍門謁見高祖謂之曰隋氏失馭天下沸騰吾忝以外戚屬當重寄不可坐觀時變晉陽是用武之地士馬精強今率驍雄以輔國難卿將家子

深有智謀觀吾此舉將爲濟否瓌曰後主殘酷無道征役不息天下惴惴思聞拯亂天縱神武親舉義師所下城邑秋毫無犯軍令嚴明將士用命關中所在蜂起惟待義兵仗大順從衆欲何憂不濟瓌在馮翊積年人情諳練願爲一介之使銜命入關同州已東必當款伏于梁山船濟直指韓城進逼郃陽分取朝邑且蕭造文吏本無武畧仰懼威靈理當自下孫華諸賊未有適從必當相率而至然後鼓行整衆入據永豐雖未得京城關中故已定矣高祖曰是吾心也迺授銀青光祿大夫遣陳演壽史大柰領步騎六千

趨梁山渡河使瓌及薛獻爲招慰大使高祖謂演壽曰聞外之事宜與任瓌籌之孫華白玄度等聞兵且至果競來降并具舟于河師遂利涉瓌說下韓城縣與諸將進擊飲馬泉破之拜左光祿大夫留守永豐倉高祖卽位改授穀州刺史王世充數率衆攻新安瓌拒戰破之以功累封管國公

姜謨秦州上邽人隋大業末爲晉陽長會高祖留守太原見謨深器之謨退謂所親曰隋祚將亡必有命世大才以應圖籙唐公有霸王之才必爲撥亂之主繇是深自結納及大將軍府建引爲司功將軍從平

霍邑拔絳郡監督大軍濟河時兵士爭渡謨部勒諸軍自昏至曉大軍畢濟高祖稱嘆之平京城除相國兵曹參軍封長道縣公時薛舉寇秦隴以謨西州之望詔於隴右安撫承制以便宐從事謨將行奏曰天人之望誠有所歸願早膺圖籙以寧兆庶老夫犬馬暮齒恐先朝露得一覩昇紫殿死無所恨高祖大悅謨與竇軌出散關下河池漢陽二郡軍次長道與薛舉相遇軌輕敵爲舉所敗徵謨還京拜員外散騎嘗侍及平薛仁杲拜謨秦州刺史

柴紹矯捷有勇力尙武任俠聞于關中高祖龍潛時

妻之次女即平陽公主也初太宗見隋大亂陰懷濟
 天下之心以紹親戚有武用告其志事紹遂間行出
 河東與隱太子建成會既知起義兵建成謀於紹曰
 追書甚急恐已起事隋郡縣連城相接千有餘里中
 間偷路勢必不全今欲且投小賊權以自濟紹曰不
 可追書既急宜其速去雖稍辛苦終當獲全若投小
 盜知君唐公之子執以為功徒然死耳建成從之遂
 相與走太原入雀鼠谷已知起義于是相賀以紹之
 計為得太宗拜右軍大都督以紹為長史加銀青光
 祿大夫及破霍邑下臨汾平絳郡並先登陷陣既入

關平陽公主以司竹之軍來會命紹及馬三寶分統

其眾

時隋將桑顯和來擊孫華率精騎渡河以授之紹引軍直掩其背與史大柰合勢擊之顯和大

敗因與諸將進下京城

高祖受禪拜左衛大將軍從太宗平薛

舉破宋金剛于雀鼠谷攻王世充於雒陽平竇建德

于武牢並有戰功

馬三寶本柴紹之家僮性狡猾善調鷹犬及紹尚平

陽公主三寶給使于皇家義兵之起也三寶奉平陽

公主遁于司竹投賊帥何潘仁潘仁謁公主以百兵

為主衛三寶自稱摠管以主之命綏輯羣盜多來歸

欵略地鄆杜有近兵一萬號為娘子軍及義兵濟河

授左光祿大夫太宗至竹林宮三寶以衆數萬詣軍門進謁從平京師拜大監門率

何潘仁西城胡人父渾邪通商中國隋初始居盤屋家富於財潘仁厚自奉養引致賓客煬帝時爲幕士鬱鬱不得志後嘗犯法懼罪遂亡入司竹園中鳩集亡命衆至數萬執隋前尚書左丞李剛爲長史長安以西城邑多爲所破及義兵起求得平陽公主而奉之以應義師高祖入關卽授上柱國封盤屋縣公潘仁馳來謁見高祖大悅

姜寶諡天水人隋末以軍功致位通議大夫鷹揚郎

將以其府兵從高祖討捕于太原及義兵起授左統軍平西河下霍邑皆有功焉累轉光祿大夫封永安郡公武德初拜武衛大將軍

劉政會初仕隋爲鷹揚府司馬在太原與晉陽令劉文靜敦敘宗室亟相往來及高祖行軍于太原政會率兵隸於麾下太宗與文靜謀圖起義募人旣集王威等懷貳于我後數日將大會於晉陽威及高君雅等謀危高祖有人以白太宗旣知迫急欲先事誅之因遣政會爲急變之書執詣留守所告威君雅二人相與謀反是日高祖在衙中須臾二人及裴寂相次

竝集俱坐視事文靜引政會入至庭中云有密狀知人欲反高祖指威等令取狀看之政會不肯與曰所告者是副留守事惟唐公得看之爾高祖佯驚曰豈有是乎搗政會進覽狀訖謂二人曰此人告公事如何君雅起牀前攘袂大吼曰此是反人欲殺我也時太宗已布列兵馬圍遶周遍王威知事不免因曰他人誣告只得聽推逐爾文靜遂叱左右引之而下就拘于別室既囚威等竟得舉兵政會之功也及大將軍府建引爲戶曹參軍從平長安以佐命元勳蒙歷任委

寶琮有武幹初仕隋佐親衛大業未犯法亡命之太原依于高祖時太宗方收英傑與琮有舊親敬彌篤出入臥內將義舉琮協贊大謀大將軍府建以爲統軍從平西河破霍邑拜金紫光祿大夫封扶風郡公邑二千戶尋從劉文靜擊屈突通于潼關通遣裨將桑顯和來逼文靜義軍不利琮與段志玄等力戰久之隋軍大潰通道走琮率輕騎追至稠桑獲通而反進兵東略下陝縣拔太原倉拜右領軍大將軍賜物五百段

武士護初爲晉陽宮留守府司鎧參軍事義兵將起

高祖陰募勇敢士遣劉弘基長孫順德等分統之副
留守王威高君雅謂士護曰弘基等皆從征三衛所犯
不輕吾欲禁身推覈士護曰此竝唐公客也若爾便
太紛紜威等繇是疑而不發高祖先令士護密伏兵
於宮城東門外以防不虞留守司兵田德平知之方
欲白王威等士護遽與德平論利害之機曰當分討
捕之兵摠隸唐公城中募人皆劉晉陽之所統也高
君雅等寄坐耳須發卽起彼何能爲德平遂止及高
祖舉義執王威君雅等士護以功授正護大夫大將
軍府司錄參軍并賜物等武德初勅宴元勳人等於

含章殿賜酒作樂散金銀錢頗羅等任取多少仍有
詔與長孫順德等合恕一死以彰元勳累遷工部尙
書歷揚州都督賜實封八百戶

楊屯初仕隋爲鷹揚郎將遇高祖討捕于太原屯領
部兵于麾下性謹直勇於攻戰高祖甚愛寵之遇起
義以爲統軍從太宗擊西河平霍邑竝功居最以佐
命元勳約免一死歷諸衛大將軍甚蒙遇任
長孫順德初仕隋爲右勳衛避遼東之役逃匿于太
原深爲高祖太宗所親委時群盜竝起郡縣各募兵
爲備太宗外以討賊爲名因令順德與劉弘基等名

募旬日之間衆至萬餘人結營於都下遂誅王威高君雅等義兵起拜統軍從平霍邑破臨汾下絳郡俱有戰功尋與劉文靜擊屈突通於潼關每戰摧鋒及通將奔雒陽順德追及桃林執通歸京師仍畧定陝縣高祖卽位拜左驍衛大將軍封薛國公
殷嶠初仕隋爲大谷長義兵起召補大將軍府掾參預謀畧授心腹之寄累以軍功拜光祿大夫從隱太子攻尅西河太宗爲渭北道元帥引爲長史時關中群盜往往聚結衆無適從令嶠招慰之所至皆下又與統軍劉弘基率兵六萬屯長安故城隋將衛孝節

金光門出戰嶠與弘基擊破之京城平賜爵陳郡侯志玄父偃師隋末爲太原郡書佐志玄從父在太原甚爲太宗所接待義兵起志玄募得千餘人授石頭大都督府軍頭從平霍邑下絳郡攻永豐倉皆爲先鋒歷遷光祿大夫後遷鎮軍大將軍卒

馬元規安陸人也初以隊正從高祖征討因建義舉乃仗節山南下浙南陽二郡及其屬縣得兵萬餘人

冊府元龜

將帥部

善武賦交劉人亦以斜五發高臨匪情因妻美舉
 吳翰烈獸光新大夫對獸驗軍大將軍卒
 趙大勝贊軍應發平雲邑不終縣文承豐會者為
 孤許為太宗祖對封美兵賦志支暮爵干斜人封臣
 吳許夜父對福朝未為太鳳賦書武志支對父環太
 吳全大門出輝融與臣基學如之京熱平顯晉朝

冊府元龜

淮南李嗣京參閱

西極文翔鳳訂正

豫章黃國琦較釋

將帥部 七

佐命第七

梁麗師古曹州南華人初以中涓從太祖性端愿未
 嘗離左右及太祖鎮汴樹置戎伍始得馬五百匹即
 以師古為偏將軍援陳破蔡累有戰功及朱珍以罪
 誅遂用師古為都指揮使乃渡淮餉軍于廬壽攻滁

州破天長下高郵沿淮轉戰所至克捷尋伐朱友裕
領軍攻下徐州斬時溥首以獻遂移軍伐兗入中都
寨于梁山敗朱瑄之衆襲至壘下又破朱瑾于清河
從討汝陽與朱瑄朱瑾及晉將史儼兒戰于故樂亭
大捷而回唐昭宗乾寧四年正月復統諸軍伐鄆拔
之擒其帥朱瑄以獻始表爲天平節度留後尋以功
授徐州節度使後與淮人戰沒于陣

霍存昭州曲周縣人性驍勇善騎射在黃巢中已爲
將領唐僖宗中和四年太祖大破巢軍于王藩渡時
存與葛從周張歸霸皆自巢軍來降太祖宥而納之

其後破王夏寨擊殷鐵林並在戰中尋佐朱珍取滑
臺攻淄州趙傳昌皆預戰立功蔡賊張郢在汴北存
以三千人夕犯其營破之用本部騎兵敗秦賢軍殺
五千人連破四寨盡得其輜重從討盧塘張郢殪萬
餘人存功居多我軍之圍濮州也有賊升眺樓大詬
太祖怒甚召存射之矢一發而屍殞其下賞賚甚厚
復佐朱珍擒石璠破魏師敗徐戎又佐龐師古至呂
梁敗時溥二千餘衆以是累遷官初王師渡淮乏食
不甚利唯存軍戰有功淮賊乃引退太祖之討宿州
也葛從周以水壞其垣丁會以師乘其墉存戰壘外

敗其軍宿人乃降明年佐郴王友裕擊時溥于礪山破之獲蕃將石君和等五十人是歲復與晉軍戰于馬牢川始入爲前鋒出則後拒虜不敢逼乃渡河襲淇門殺三十餘人曹州刺史郭紹賓之來歸也存以師援之遂代其任始朱友裕以大軍伐鄆臨其壁旣而師陷圍中以急來告存領二百騎馳赴擊退之太祖喜拔爲諸軍都指揮使後與徐兗之衆合戰於石佛山下中流矢而卒

張存敬譙郡人也性剛直有膽勇臨危無所畏懼唐僖宗中和中從太祖赴汴以其壯節頗見親昵首爲右驍都尉從討巢蔡凡歷百戰多於危蹙之間顯有奇畧繇是頻立殊効光啓中李罕之會晉軍圍張崇爽於盟津太祖遣丁會葛從周及存敬同往馳救存敬引騎軍先犯虜騎諸軍翼之虜騎大敗乃解河南之圍昭宗大順二年爲諸軍都虞候佐霍存董大軍收宿州以功奏加簡較兵部尙書太祖東征徐兗存敬屢有俘斬之功凡受指顧皆與機會矢石所及必以身先太祖尤加優異以爲行營都指揮使後累以戰功除護國將軍留後移宋州刺史將之任卒寇彥卿大梁人也祖瑄父裔皆宣武軍牙較太祖鎮

汴以彥卿將家子擢在左右弱冠選爲通贊官太祖
爲元帥府押牙領維州刺史羅紹威將殺牙軍遣使
告于太祖太祖命彥卿使于魏密與紹威謀之竟成
其事彥卿之力也彥卿身長八尺隆準方面語音如
鐘善騎射好書史復善伺太祖之旨凡所作為動皆
玄合太祖每言曰敬翔劉捍寇彥卿蓋爲我而生其
見重如此太祖有所乘馬號一丈烏嘗以賜彥卿唐
天復中太祖迎昭宗于鳳翔累與岐軍對陣時彥卿
爲諸道馬步軍都排陣使嘗躬擐甲胄乘其所賜烏
馬騁于陣前太祖目之曰真神王也昭宗還京賜迎

鑿毅勇功臣改邢州刺史尋遷亳州團練使太祖受
禪授華州節度使

葛從周濮州鄆城人從周少豁達有智畧初入黃巢
軍漸至軍較唐僖宗中和四年三月太祖大破黃巢
於王藩渡從周與霍存張歸霸昆弟相率來降七月
從太祖屯兵於西華破蔡賊王夏寨太祖臨陣爲蹄
賊衆來追甚急從周扶太祖上馬與賊軍格鬪傷面
矢中于肱身被數鎗奮命以衛太祖賴張延壽回馬
轉鬪從周與太祖俱免退軍澱水諸將竝削職唯擢
從周延壽爲大較其後入長葛靈井大敗蔡賊至斤

溝澠河殺鐵林三千人獲九寨都虞候王涓太祖遣郭言募兵於陝州有黃花子賊據於溫谷從周擊破之又破秦賢之衆於滎陽尋佐朱珍收兵於淄青間時兗州齊克讓軍於任城從周破之擒其將呂全真淄人不受制復與之戰獲其驍將鞏約會青州以步騎萬餘人列三寨于金嶺以阨要害從周與朱珍戰大殲其衆虜其將楊昭範五人而還至太原不解甲徑至板橋擊蔡賊破盧塘寨塘自溺而死又于赤岡殺蔡軍二萬餘人從討謝殷于亳州擒之廻襲曹州虜刺史丘弘禮以歸與兗鄆軍遇於臨濮之劉橋間

殺數萬人朱瑄朱瑾僅以身免擒都將鄒務卿以下五千人從太祖至范縣復與朱瑄戰虜尹萬榮等三人遂平濮州未幾與朱珍擊蔡賊於陳亳間獲都將石璠文德元年魏博軍亂樂從訓來告急從太祖渡河拔黎陽李固臨河等鎮至內黃破魏軍萬餘衆獲其將周儒等十人李罕之引并人圍張全義於河陽從周與丁會張存敬牛存節率兵赴援大破并軍殺蕃漢二萬人解河陽之圍以功表授簡較工部尚書從朱珍討徐州拔豐縣敗時溥於吳康得其輜重加簡較刑部尚書佐龐師古討孫儒於淮南略地至廬

壽滌等州下天長高郵破邵伯堰廻軍攻濠州殺刺史魏勳得餉船十艘昭宗大順元年八月并師圍潞州太祖遣從周率敢死之士夜銜枚犯圍而入會王師不利於馬牢川卽棄上黨而歸其年十二月與丁會諸將討魏州連收十邑明年正月大破魏軍于永定橋魏軍五敗斬首萬餘級十月佐丁會攻宿州從周壅水灌其城刺史張筠以郡降從討兖州破朱瑾之軍於馬溝景福二年二月與諸將大破徐兗之兵於石佛山八月與龐師古同攻兖州乾寧元年三月軍至新太縣朱瑾令都將張約李胡椒帥三千人來

拒戰師古遣從周張存敬掩襲生擒張約李胡椒等都將數十人二年十月圍兖州兗人不出從周詐揚言并人鄆人來救卽引軍趨高吳夜半潛却歸寨朱瑾果出兵攻外壕我軍士突出掩殺千餘人生擒都將孫漢筠從周累立戰功自懷州刺史歷曹宿二州刺史累遷簡較左僕射三年五月并師以大軍侵魏遣其子落落率二千騎屯洹水從周以馬步二千人擊之殺戮大盡擒落落于陣并師號泣而去遂自洹水與龐師古渡河擊鄆四年正月下之從周乘勝伐兖州朱瑾出師在徐境其將康懷英以城降以功授

兖州留後簡較司空復領兵萬餘人渡淮討楊行密至濠州聞龐師古清口之敗遽班師光化元年四月率師經畧山東時并帥以大軍屯邢洛從周至鉅鹿與并軍相遇大破之并帥遁走我軍追襲至青山口數日之內邢洛磁三州連下斬首二萬級獲將吏一百五十人卽以從周兼領邢州留後十月復破并軍五千騎于張公橋晉將李嗣昭急攻邢州陣于城外從周大破之擒蕃將賁金鐵慕容騰等百餘人二年春幽州劉仁恭率軍十萬寇魏州屠其郡從周自邢臺馳入魏州燕軍突上水關攻館陶門從周與賀德

倫率五百騎出戰謂門者曰前有敵不可返顧令闔其門從周等極力死戰大破燕人擒都將薛突厥王卽郎等翊日破其入寨追擊至臨清劉仁恭走滄州從周受宣義軍司馬五月并人討李罕之於潞州太祖以丁會代罕之令從周馳入上黨七月并人陷澤州太祖召從周令賀德倫守潞州德倫等尋棄城而歸三年四月領軍討滄州先攻德州下之及進攻浮陽幽州劉仁恭大舉來援時都監蔣玄暉謂諸將曰吳王命我護軍志存攻取今燕師來赴不可外戰當縱其入壁聚食困廩力屈糧盡可取也從周對曰兵

在機機在上將非督護所言也乃令張存敬氏叔宗守其寨從周逆戰于乾寧軍老鴉堤大破燕軍斬首三萬獲將佐馬慎交已下百餘人奪馬三千匹八月并人攻邢洛從太祖破之從周追襲至青山口斬首五千級獲其將王郃郎楊師悅等得馬千匹表授簡較太保兼徐州兩使留後尋爲兗州節度使天復元年三月與氏叔琮討太原從周以兗鄆之衆自土門路入與諸軍會於晉陽城下以糧運不給班師頃之從周染疾會青山將劉鄩陷兗州太祖命從周討之遂力疾臨戎三年十一月鄩舉城降以功授簡較太

傳後致仕

張歸霸清河人歸霸少倜儻好兵術唐僖宗乾符中寇盜蜂起歸霸率昆弟三人棄家投黃巢頗以勇畧聞巢陷長安遂署爲左蕃功臣中和中巢領徒走宛丘時太祖在汴奉詔南討巢黨日尅歸霸昆仲與葛從周李讜等相率來降尋補宣武軍劇職光啓二年與蔡將張存戰于盧氏三年夏又與蔡將盧塘戰于雙丘復與秦宗賢戰于萬勝皆敗而殲之翌日秦宗權遣將張郢來寇列寨於赤欄一日出騎將較勝歸霸爲飛弋所中卽拔馬却逸控弦一發賊洞頸而墜

遂兼騎而還太祖時于高丘下瞰備見其狀面加賞
激厚以金帛及所獲馬錫之又嘗被命以控弦之士
五百人伏于壕內太祖統數百騎稍逼其寨蔡人果
以銳士麾壘來追歸霸發伏兵掩殺千餘人奪馬數
十匹尋奏授簡較左散騎嘗侍其後從太祖伐鄆副
李唐賓渡淮咸著奇績文德初大軍臨蔡州賊將蕭
顥來斫寨歸霸與徐懷玉各以所領兵自東南二扉
分出合勢殺賊蔡人大敗及高祖整衆離營寇塵已
息太祖召至賞之曰昔耿弇不俟光武擊張步言不
以賊遺君父弇之功爾其二焉昭宗大順中郭紹賓

拔曹州歸霸提兵數千守之俄而朱瑾統大軍自至
歸霸與丁會逆擊之于金鄉瑾大敗擒賊將宋江等
七十餘人曹州以寧明年破濮州生擒刺史邵儒又
佐葛從周與晉軍戰于洹水生擒克用愛子落落復
與燕人戰於內黃殺仁恭兵三萬餘衆戎績超特居
諸將之右累官至簡較左僕射光化二年權知邢州
事明年春李嗣昭以蕃漢五萬來寇歸霸堅壁設備
晉軍不敢顧其城遂移軍攻洛州陷焉時太祖在滑
頗慮邢之失守及葛從周復洛水嗣昭北遁歸霸出
兵襲之殺二萬餘衆捷至賞賜殊等旋以功奏加簡

較司空天祐初遷萊州刺史秩滿授左衛上將軍又除曹州刺史其秋加簡較司徒副劉知俊禦邠鳳之寇敗之太祖受禪拜右龍虎統軍

楊師厚潁川斤溝人也初爲李罕之部將以猛決聞光善騎射及罕之敗退保澤州師厚與李鐸何綱等來降太祖署爲忠武軍牙將繼歷軍職累遷簡較右僕射表授曹州刺史唐昭宗天復二年從太祖迎昭宗於岐下李茂真以勁兵出戰爲師厚所敗及王師範以青州叛太祖遣師厚率兵東討時淮賊王景仁以衆二萬來援師範師厚逆擊破之追至輔唐縣斬

首數百級授齊州刺史將之任太祖急召見於鄆西境遣師厚率步騎屯于臨朐而聲言欲東援密川留輜重於臨朐師範果出兵來擊師厚設伏於野追擊至聖玉山殺萬餘衆擒都將八十人未幾萊州刺史王師誨以兵救師範又大敗之自是師範不復敢戰師厚移軍寨於城下師範力屈竟降三年二月加簡較司徒徐州節度使天祐元年加諸軍行營馬步都指揮使二年八月太祖討趙凝於襄陽命師厚統前軍以進趙凝嚴兵以備師厚至穀城西童山刊木造浮橋引軍過漢水一戰趙凝敗散携妻子沿漢遁去

翌日表師厚爲山南東道節度留後卽令南討荊州
留後趙明亦棄軍上峽不浹旬併下兩鎮乃正授襄
州節度使太祖受禪加簡較太保同平章事

牛存節青州博昌人也本名禮太祖改而字之少以
雄勇自負唐僖宗乾符末鄉人諸葛爽爲河陽節度
使存節往從之爽卒存節謂同輩曰天下汹汹當擇
英主事之以圖富貴遂歸于太祖初授宣義軍小將
屬蔡寇至金堤驛犯酸棗靈昌存節日與之鬪凡二
十餘往每往必執俘而還前後斬首二千餘級獲孳
畜甚衆太祖擊蔡賊于板橋赤堦酸棗門封禪寺枯

河北存節皆預其行與諸將於濮州南劉橋范縣大
破鄆衆自此浮爲太祖獎遇文德元年夏李罕之以
兵圍張宗奭於河陽太祖遣存節率軍赴之屬歲歉
饑饉不至村民有儲乾糶者存節以器用錢帛易之
以給軍食大破賊於淇河罕之引衆北走又預計徐
宿有功及討河北存節前鋒下黎陽收臨河至內黃
四以兵千餘人當魏人萬二千衆大破其陣僵仆蔽
野太祖深所歎激謂有神兵之助昭宗大順元年改
滑州左右廂牢城使諸將討時溥累破賊軍景福元
年秋改過後都指揮使攻濮之役領軍先登遂拔其

壘二年四月下徐州梟時溥存節力戰其功居多乾
寧三年夏太祖東討鄆州存節領軍次故樂亭扼其
要路都指揮使龐師古屯馬頰存節密與都將王言
謀入鄆壘十二月存節遣王言夜伏勇士於州西北
以船踰濠舉梯登陴既而王言不克入存節獨率伏
軍負梯踵破其西壘城奪其濠橋諸軍俱進四年正
月陷其城尋與葛從周降下兗州其年秋大舉以伐
淮南至濠州東聞前軍失利于青口諸軍退至泲河
無復隊伍存節遇其後與諸將大騎步鬪諸軍稍得
濟收合所部并敗兵共八千餘人至于淮渙時不食

已四日矣存節訓勵部分以禦追寇遂得旋師五年
除濠州刺史俄遷宣武軍都指揮使改宿州刺史明
年淮賊大至彭城存節乃以部下兵夜發直趣彭門
淮人訝其神速震恐而退諸將服其智識光化二年
罷歸復爲左衛都將兼馬步教練使天復元年授潞
州馬步都指揮使法令之整士庶安之及追赴行在
士卒泣送者不絕於道加金紫光祿大夫簡較司空
改滑州左衛步軍指揮使知邢州軍州事天祐元年
授邢州團練使時州兵未及二百人晉人知之以大
軍來寇太祖在鄴發長直兵二千人赴援存節率壯

健出門以家財賞激戰士并軍急攻之七日不能克而去太祖召至勞慰久之厚賚金帛鞍馬冬罷郡署為元帥府左都押牙四年太祖受禪除右千牛衛上將軍

王彥章鄆州壽張縣人也彥章少從軍隸太祖帳下以虓勇聞稍遷軍職累典禁兵從太祖征討所至有功嘗持鐵槍衝堅陷陣敵人畏之目之為王鐵槍開平二年十月自開封府押牙左親從指揮使授左龍天軍使三年轉左監門衛上將軍依前左龍驤軍使徐懷玉本名琮亳州雋夷縣人少以雄傑自任隨太

祖起軍唐僖宗中和末從赴大梁光啓初蔡寇屯金堤驛懷玉將輕騎連破之繇是累遷親從副將改左長劔都虞候又從破蔡賊於板橋收秦宗權入寨文德初同諸將解河陽之圍復從破徐宿乾寧中太祖賜名懷玉又破朱瑾於金鄉南擒宋江以獻龐師古失利于清口懷玉獨完軍以退光化初轉滑州右都押牙兼右步軍指揮使俄奏授沂州刺史頃之王師範以青州叛屢出兵侵軼懷玉擊退之天復三年轉齊州防禦使從大軍迎駕于岐下歸署華州觀察留後一年復領所部兵戍雍州尋召赴河中補晉絳同

華五州馬步都指揮使天祐三年授左羽林統軍轉
右龍虎統軍領六軍之士赴澤州尋爲晉軍所攻晝
夜衝擊穴地而入之王率親兵逆殺於隧中晉人遂
退開平元年授曹州刺史

劉捍開封人少爲牙職太祖初鎮夷門以捍聰敏擢
副典客唐僖宗中和四年夏太祖以朱珍爲淄州刺
史令收兵於淄青間命捍監其兵路逢大敵皆破之
入博昌獲精兵三萬以歸四月合大軍敗蔡賊秦宗
賢數萬衆於汴西文德元年十一月蔡將申叢折宗
權足納欵于太祖使捍奏其事加兼察御史大夫光

化三年六月太祖北伐鎮定至恒山而王鎔危懼送
欵於太祖命捍入壁門傳諭時兩軍未整守門者戈
戟千匝捍馳騎而入竟達其命又移師次中山至懷
德驛大破定人五萬衆王處直乞降捍復單馬入州
安撫而迴太祖迎昭宗于岐下以捍爲親事指揮使
天復三年正旦宋文通令客將郭啓奇使於太祖命
捍復命昭宗聞其至卽召見詢東兵之事仍以錦服
銀鞍勒馬賜之翌日授登州刺史昭宗還京改嘗州
刺史賜號迎鑾毅勇功臣四月太祖伐王師範於青
州改左右長直都指揮使天祐三年正月授宋州刺

史太祖受禪授左龍虎統軍兼元從親軍馬步都虞侯

朱珍徐州豐縣雍鳳里人也太祖初起兵珍與龐師古許唐李暉丁會氏叔琮鄧季筠王武等八十餘人以中涓從摧堅陷陣所向盪決及太祖鎮汴領招討使署珍爲宣武右職唐僖宗光啓元年署諸軍都指揮使始爲上將太祖令珍募兵至乾封與淄人戰于白草口敗之青人以步騎三萬列三寨於金嶺驛珍與戰連破之殲其師盡獲軍器戎馬是夕攻博昌大獲兵衆而還其後破盧塘張郢及朱琮朱瑾之衆平

定曹濮未嘗不在戰中梁山之救珍以踏白騎士入陳毫間以邀蔡人遂南至斤溝破淮西石璠之師三萬人虜璠以獻珍旋師自毫北趨靜戎濟舟于滑破黎陽臨河李固三鎮軍于內黃敗樂從訓萬餘人分命聶金范居實畧澶州與魏師遇于內黃魏軍有豹子軍二千人戮之無噍類威振河朔復攻淮西至上蔡夾河而寨敗將蕭皓之衆皆擁于河溺死之進軍蔡州營其西旣破羊馬垣遇雨班師珍以兵援劉贇赴樊州至襄山南遇徐戎扼其路珍乃攻豐下之時溥乃以全師會戰于豐南吳康里珍敗其三萬餘衆

及蔡賊平琮比諸將功居多昭宗龍紀初與諸將屯於蕭縣以禦時溥及太祖往蕭縣琮率將較迎謁氏叔琮尉氏人唐末應募爲騎軍初隸于龐師古爲伍長叔琮壯勇沉毅膽力過人太祖討巢蔡於陳許間叔琮奮擊首出諸較太祖壯之自行伍間擢爲後院馬軍都將時東伐徐鄆多歷年所叔琮身當矢石奮不顧命觀者許焉累遷爲指揮使尋奏授宿州刺史簡較左僕射

鄧季筠宋州下邑人也少入巢軍隸于太祖麾下及太祖鎮汴首署爲牙將主騎軍伐鄆之役生擒排陣

將劉矯以獻

康懷英兖州人太祖素聞其名得之甚喜尋署爲軍較唐昭宗光化元年秋從氏叔琮伐襄漢懷英以一軍攻下鄧州三年從征河朔佐張存敬敗燕軍于易水之上天復元年冬太祖率師迎昭宗于鳳翔時李茂真遣大將符道昭領兵萬餘屯武功以拒太祖太祖命諸將擊之以懷英爲前鋒領衆先登一鼓而大破之虜甲士六千餘人奪馬二千匹翌日太祖方至顧左右曰邑名武功今首盪逆黨真武功也乃召懷英大加獎激仍以駿馬珍器賜之二年四月符道昭

復領大軍屯於魏縣之莫谷其建寨之所前臨巨澗後倚峻阜險不可升太祖遣懷英提騎數千急擊之道昭以懷英兵寡有俯視之意乃率甲士萬人絕澗以挑戰懷英始以千騎交關戰酣發伏以擊之岐軍大敗秋八月鄜帥李周彝屯軍於三原以援鳳翔太祖命懷英討之周彝拔軍而遁追至黎園因攻下翟州擒其守來獻俄而岐軍屯奉天太祖令懷英寨于岐軍之東北以備敵人一夕岐軍大至急攻其營懷英以夜中不可驚動諸軍獨以三千餘人抗數萬之衆自乙夜至四鼓身被十餘槍岐軍不勝而退昭宗

還京賜迎饗毅勇功臣是歲淮人聞青兗之叛遣兵數萬以寇宿州太祖命懷英馳騎以救之淮人遁去卽以懷英爲權知宿州刺史天祐三年冬佐劉知俊破邠鳳之衆五萬于美原收十五餘寨乘勝引軍攻下鄜州以功授陝州節度使太祖受禪加簡較太保郭言太原人也家于南陽新野少以力穡養親鄉里稱之唐僖宗廣明中黃巢擁衆西犯秦雍言爲巢黨所執後從太祖赴汴初爲騎軍繼有戰功後擢爲裨較言性剛直有權畧勤于戎事或以家財分給將士之貧者繇是頗得士心屢將兵與蔡寇戰于浚郊每

以少擊衆出必勝歸太祖嘉其勇果謂賓佐曰言乃
吾之虎侯也時秦宗權支黨數十萬太祖兵不過數
千每恨其寡與之不敵一日命言董數千人越河雒
趨陝虢招召丁壯以實部伍言夏往冬旋得銳士萬
餘遂遷步軍都將自是隨太祖掩襲蔡寇斬獲掠奪
不可勝計宗權以茲敗北太祖盡收其地因命言將
兵導達貢奉以安郵傳自汴鄭迄於潼關去奸恤弱
甚得其所光啓中僖宗以太祖兵威日振命兼領揚
州節度使太祖遣幕吏李璠領兵赴淮揚以制置爲
名時言爲李璠前鋒深入淮甸破盱眙而還梁祖東

伐徐鄆言將偏師畧地千里頻逢寇敵言出奇決戰
所向皆捷大挫東人之銳太祖錄其績以排陣斬斫
之號委之尋表爲宿州刺史簡較右僕射于時徐宿
兵鋒日夕相接控扼偵邏以言爲首

劉康乂壽昌安封縣人也以農桑爲業唐僖宗乾符
中關東羣盜竝起江淮間徧罹其酷因爲巢黨所掠
康乂沈默有膂力善用矛槩然不樂爲暴中和三年
從太祖赴鎮委以心腹康乂枕戈擐甲夷險無憚其
後累典親軍襲巢破蔡斬獲尤多累以戰功遷元從
都將從太祖連年攻討徐兗鄆所向多捷尤善於營

壘充諸軍壕寨使及太祖盡下三鎮議其功奏加簡
較右僕射兼領軍衛

范居實絳州翼城人
事太祖初為隊將軍從討巢蔡
有功又從朱珍收滑州改左廂都虞侯預破兗鄆功
遷感義都頭鄭州馬軍指揮使幽州劉仁恭舉眾南
下寇魏郡北圍居實與葛從周張存敬率兵救魏大
破幽滄之眾於內黃太祖迎昭宗於岐下以居實為
河中馬軍都指揮使及昭宗還京賜迎鑾毅勇功臣
遙領錦州刺史又遷左龍驤馬軍都指揮使從征淮
南廻改登州刺史轉左神勇軍使開平元年用軍於

澠州命居實統軍以解州之圍授耀州刺史令以
兵屯固鎮尋除澤州刺史居實拳勇善戰頗立軍功

册府元龜

佐命七

卷之三百四十六

國
國
國

册府元龜

淮南李嗣京叅閱

西極文翔鳳訂正

豫章黃國琦較釋

將帥部 八

佐命第八

後唐李嗣昭武皇母弟代州刺史克柔之假子也小
字進通不知族姓所出少從征伐精練軍機唐昭宗
乾寧四年爲內衙都將援河中敗汴軍於胡壁堡擒
汴將滑禮及王珂請婚於武皇武皇以女妻之珂赴

册府元龜

將帥部

卷之三百四十六

禮會於太原以嗣昭權典河中留事李罕之襲我潞州也嗣昭率師攻潞與汴將丁會戰于舍口俘獲三千執其將蔡延恭代李君慶爲蕃漢馬步行營都將進攻潞州遣李存質李嗣本以兵扼天井關汴將澤州刺史劉玘棄城而遁乃以李存璋爲刺史梁祖聞嗣昭之師大至召葛從周謂曰并人若在高平當圍而取之先須野戰勿以潞州爲敵及聞嗣昭軍韓店梁祖曰進逼扼入議路此賊決與我鬪公等臨事制機勿落奸便賀德倫閉壁不出嗣昭日以鐵騎環城汴人不敢芻牧援路斷絕八月德倫張歸厚棄城遁

去遂復取潞州三年汴人攻滄州劉仁恭求救遣嗣昭出師邢洛以應之嗣昭遇汴軍於沙河擊敗之獲其將胡禮進攻洛州下之獲其郡將朱紹宗九月梁祖自率軍三萬至臨洛葛從周設伏於青山口嗣昭聞梁祖斂軍而退從周伏兵發爲其所敗偏將王郃郎楊師悅等被擒十月汴人大寇鎮定王郃告急於武皇乃遣嗣昭出師下太行擊懷孟汴將侯言守河陽不意嗣昭之師至旣無守備驅市人登城嗣昭攻其北門破其外垣俄而汴將閻寶救軍至乃退天復元年河中王珂爲汴軍所虜河中晉絳諸郡皆陷四

月汾州刺史李瑋謀叛納款於汴嗣昭討之三日而
拔斬瑋是月汴人初得蒲絳乃大舉諸道之師來逼
太原汴將葛從周陷承天軍氏叔琮營洞涸驛太原
四面汴軍雲合武皇憂迫計無從出嗣昭朝夕選精
騎分出諸門掩擊汴營左將右斬或燔或擊汴軍疲
於奔命又屬霖雨軍多腫痢糧運不繼五月氏叔琮
引退嗣昭以精騎追之汴軍乃棄輜重兵仗萬計六
月嗣昭出師陰地攻慈隰降其刺史唐禮張瓌是時
天子在鳳翔汴人攻圍有密詔徵兵十一月嗣昭出
師晉絳屯吉上堡與汴將王反遇於平陽一戰擒之

明年正月嗣昭進營蒲縣十八日汴將朱友寧氏叔
琮將兵十萬來拒二十八日梁祖自率大軍至平陽
嗣昭之衆大恐三月十一日有白虹貫周德威之營
候者云不利亥班師翌日氏叔琮犯德威之營汴軍
十餘萬列陳四合德威嗣昭血戰解之乃保軍而退
汴軍因乘之時諸將潰散無復部伍德威引騎軍循
西山而遁朱友寧乘勝陷慈隰汾等州武皇聞其敗
也遣李存信率牙兵至清源應接復爲汴軍所擊汴
軍營於晉祠嗣昭德威收合餘衆登城拒守汴人治
攻具於西北隅四面營柵相望時鎮定河中皆爲梁

有孤城無援師旅敗亡武皇晝夜登城憂不遑食召諸將謀欲出保雲州嗣昭曰王勿為此謀兒等苟存必能城守李存信曰事勢危急不如且入北蕃別圖進取朱溫兵師百萬天下無敵關東河北受他指揮今獨守危城兵亡地蹙儻彼築室反耕環塹深固則亡無日矣武皇將從之嗣昭亟爭不可猶豫未決賴劉太妃極言於內武皇且止數日亡散之衆復集嗣昭晝夜分兵四出斬將擐旗汴軍保守不暇二十一日朱友寧燒營退去嗣昭追擊復收汾慈隰等州五月雲州都將王敬暉據城叛振武石善友亦為部將

契苾讓所逐嗣昭皆討平之天祐三年汴人攻滄景劉仁恭遣使求援十一月嗣昭為昭義節度使五年五月莊宗敗汴軍破夾城嗣昭知武皇棄世哀慟幾絕時大兵攻圍歷年城中士民飢死大半塵里蕭條嗣昭緩法寬租勸農務穡一二年間軍城完集三面降於敵境寇鈔縱橫設法枝梧邊鄙不聳胡柳之戰周德威戰沒師無行列至晚方集汴人四五萬登無石山莊宗之軍懼形於色或請收軍保營詰旦復戰嗣昭曰賊無營壘去臨濮地遠日已晡晚皆有歸心但以精騎撓之無令返旆晡後追擊破之必矣我若

收軍拔寨賊入臨濮俟彼整齊復來卽勝負未決莊宗曰非兄言幾敗吾事軍較王建及又陳方畧嗣昭與建及分兵於土山南北爲犄角汴軍懼下山因縱軍擊之俘斬三萬級繇是莊宗帳餞於戚城莊宗酒酣泣而言曰河朔生靈十年饋輓引領鶴望候破汴軍今兵賦不充寇孽猶在坐食軍賦有愧蒸民嗣昭曰臣忝急難之地每一念此寢不安席大王且持重謹守惠養士民臣歸本藩簡料兵賦歲末春首卽舉衆復來莊宗離席拜送如家人禮是月汴將劉鄩攻同州朱友謙告急嗣昭與李存審援之九月破汴軍

於馮劫乃班師十九年莊宗親征張文禮於鎮州冬契丹三十萬奄至嗣昭從莊宗擊虜於新城阿保機在望都莊宗深入親與虜鬪虜騎圍之數十重良久不解嗣昭號泣赴之引三百騎橫擊虜圍馳突出沒者數十合虜退翼莊宗而還是時閻寶爲鎮人所敗退保趙州莊宗命嗣昭代寶攻真定七月二十四日王處球之兵出至九門嗣昭設伏於故營賊至發伏擊之殆盡餘三人匿於牆墟間嗣昭環馬而射之爲賊矢中腦嗣昭箠中矢盡拔賊矢於腦射賊一發而殪之嗣昭日暮還營所傷流血不止是夜卒莊宗卽

位贈太師隴西郡王長興中詔配饗莊宗廟庭

李嗣本本姓張少事武皇爲帳中紀綱漸立戰功得補軍較唐昭宗乾寧初從征李儔爲前鋒與燕人戰得居庸關以功爲義兒軍使因賜姓名從討王行瑜授簡較刑部尚書改威遠寧塞等軍使五年討羅弘信於魏州嗣本爲前鋒師還改馬軍都將從李嗣昭討王暉於雲州論功加簡較司空汴將李思安之圍潞州也從周德威軍餘吾嗣本率騎軍日與汴人轉鬪前後獻俘千計遷代州刺史六年從攻晉絳爲蕃漢副都較後爲振武節度使莊宗定魏博劉鄩據莘

縣命嗣本入太原巡守都城又從破劉鄩於故元城收洛磁衛等三郡乃還鎮振武

李嗣恩本姓駱年十五能騎射侍武皇於振武及鎮太原補鐵林軍小較從征王行瑜奉表獻捷加簡較散騎嘗侍漸轉突陣指揮使賜姓名天祐四年逐康懷英於西河解汾州之圍加簡較司空充左廂馬軍都將戰王景仁有功加簡較司徒天祐十二年從莊宗入魏擊劉鄩有功轉天雄軍馬步軍都指揮使劉鄩之北趨樂平也嗣恩襲之倍程先入晉陽時城中無備得嗣恩兵至人百其勇鄩聞其先過乃遁莘之

戰以功轉代州刺史充石嶺關已北都知兵馬使稍遷振武節度使十五年追赴行在卒於太原

李存信本姓張從武皇入關平賊始補軍職爲蕃漢都較從討李儔降赫連鐸白義誠以功加簡較左僕射從入關討王行瑜加簡較司空領柳州刺史

李存孝給事武皇帳中嘗將騎爲先鋒從武皇救陳許逐黃寇及遇難上河每戰無不克捷後收潞之師圍張濬於平陽營於趙城華州韓建遣壯士三百夜犯其營存孝謀殺代以擊之盡殲晉壓晉州西門獲賊三千自是門壁不出存孝引軍攻絳州其刺史

張行恭棄城而去張濬韓建亦繇合口而遁存孝收晉絳以功授汾州刺史

李存進振武人事武皇從入關還鎮太原署牙職從討王行瑜以功授簡較嘗侍與李嗣昭同破王珙於河中唐昭宗光化三年契丹犯塞寇雲中改永安軍使鴈門已北都知兵馬使天復初破氏叔琮前軍於洞渦三年授石州刺史莊宗初嗣位入爲步軍右都較簡較司空師出井陘授行營馬步都虞侯破汴軍於栢鄉論功授汾州刺史轉簡較司徒俄兼西南面行營招討使出師收慈州授慈沁二州刺史

李存璋雲中人武皇初起雲中存璋與康君立薛志勤等爲奔走之交從入關以功授國子祭酒累管萬勝雄威等軍從討李儔改義兒軍使唐昭宗光化二年授澤州刺史入爲牢城使從李嗣昭討雲州叛將王暉平之改教練使五年武皇疾篤召張承業與存璋授遺詔存璋爰立莊宗夷內難頗有力焉改河東馬步都虞候從破汴軍於夾城轉簡較司徒相鄉之役爲三鎮排陣使十一年從盟朱友謙于猗氏授汾州刺史汴將尹皓攻慈州逆戰敗之十三年王檀逼太原存璋率汾州之軍入城固守授大同軍防禦使

應蔚朔等州都知兵馬使秋契丹寇蔚州陷之阿保機遣使馳木書求賂存璋斬其使虜逼雲州存璋拒守城中有古鐵車乃鎔爲兵仗以給軍事虜退以功授簡較太傅同軍節度雲應等州觀察

康君立蔚州興唐人世爲邊豪唐僖宗乾符中爲雲州牙較事防禦使段文楚時羣盜起河南天下將亂代北仍歲阻饑諸部豪傑咸有嘯聚邀功之志會文楚稍削軍人儲給戍兵谷然君立與薛鐵山程懷信王行審李存璋等謀曰段公儒人難與共事方今四方雲擾皇威不振丈夫不能於此時立功立事非人

豪也吾等雖權部衆然以雄勁聞於時者莫若沙陁部復又李振武父子勇冠諸軍吾等合勢推之則代北之地旬月可定功名富貴事無不濟也君立等乃夜謁武皇言曰方今天下大亂天子付將臣以邊事歲偶饑荒便削儲給我等邊人焉能守死公家父子素以威惠及五部當共除虐帥以謝邊人孰敢異議者武皇曰明天子在上舉事當有朝典公等勿輕議予家尊遠在振武萬一相迫俟予稟命君立等曰事機已泄遲則變生曷俟千里咨稟衆因聚譟擁武皇比及雲州衆且萬人師營鬪雞臺城中械文楚以應

武皇之軍旣收城推武皇爲大同軍防禦留後衆狀以聞朝廷不悅詔徵兵來討俄而獻祖失振武武皇失雲州朝廷命招討使李鈞幽州李舉加兵於武皇攻武皇於蔚州君立從擊鈞舉之師屢敗及獻祖入韃靼君立保感義軍武皇授鴈門節度以君立爲左都押牙從入關逐黃孽收長安武皇還鎮太原授簡較丁部尙書先鋒軍使文德初李罕之旣失河陽來歸於武皇且求援焉乃以君立充南面招討使李存孝副之帥師二萬助罕之攻取河陽三月與汴將丁會牛存節戰於沈河臨戰之次騎將安休休叛入汴

軍君立引退八月授汾州刺史昭宗大順元年潞州小較安居受反武皇遣君立討平之授簡較左僕射昭義節度使

薛志勤蔚州奉誠人小字鐵山初爲獻祖帳中親信唐僖宗乾符中與康君立共推武皇定雲中以功授右牙都較從入韃靼武皇授節鴈門志勤領代北軍使從入關收京城以功簡較工部尚書河東右都押牙先鋒右軍使從武皇救陳平黃巢武皇遇難於上源驛汴將楊彥洪連車樹柵遮絕巷陌時騎從皆醉宴席旣闌汴軍四面攻傳舍志勤號勇冠絕復酒膽

激壯因獨登驛樓大呼曰朱僕射負恩無行邀我司空圖之吾三百人足以濟事因彎弧發射矢無虛發汴人斃者數十志勤私謂武皇曰事急矣如至五鼓吾屬無類矣可速行因扶武皇而去雷雨暴猛汴人扼橋志勤以其屬血戰擊敗之得侍武皇還營繇是恩顧益厚昭宗大順初張濬以天子之師來侵太原十月天軍入陰地志勤與李承嗣率騎三千抗之敗韓建之軍於蒙坑進收晉絳以功授忻州刺史二年從討鎮州收天長臨城志勤皆先登陷陣勇敢無前王暉據雲州叛討平之以志勤爲大同軍防禦使簡

較司空乾寧初代康君立爲昭義節度使
李承嗣代州鴈門人承嗣少仕郡補右職唐僖宗中
和二年從武皇討賊關輔爲前鋒王師之攻華陰黃
巢令僞客省使王汀會軍機於黃揆承嗣擒之以獻
賊平以功授汾州司馬改榆次鎮將光啓初從討蔡
賊于陳許上源之難遣承嗣奉表行在陳訴其事觀
軍容田令孜館而慰譬令達情於武皇姑務協和仍
授以左散騎嘗侍朱攻之亂遣承嗣率軍萬人援鄜
州至渭橋迎扈車駕王行瑜旣殺朱攻承嗣會鄜夏
之師入定京城獲僞相裴徹鄭昌圖函送朱攻襄王

首獻于行在駕還宮賜號迎鑾功臣簡較工部尙書
守嵐州刺史賜犒軍錢二萬貫時車駕初還三輔多
盜承嗣按兵警邏輦轂义安及還屯於鄜留別將馬
嘉福五百騎宿衛孟方立之襲遼州也武皇遣承嗣
設伏於榆社以待之邢人旣至承嗣發伏擊其歸兵
大敗之獲其將奚忠信以功授洛州刺史及張濬之
加兵於太原也時鳳翔軍營霍邑承嗣帥一軍攻之
岐人夜遁追擊至趙城合大軍攻平陽旬有三日而
拔師旋改教練使簡較司徒昭宗乾寧二年充鄆爲
汴人所攻勢漸危賊遣使乞師於武皇武皇遣承嗣

帥三千騎假道於魏度河援之時李存信屯于莘縣
既而羅弘信背盟掩擊王師因茲隔絕及朱瑄朱瑾
失守承嗣朱瑾史儼同入淮南承嗣史儼皆驍將也
淮人得之軍聲大振武皇深惜之如失左右手乃遣
趙岳間道使于淮南請歸承嗣等楊行密許之遣使
陳令存修好于武皇其年九月汴將龐師古葛從周
出師將收淮南朱瑾率淮軍三萬與承嗣設伏於清
口大敗汴人生獲龐師古行密嘉其雄才留而不遣
仍奏授簡較太尉領鎮江軍節度使

史儼代州鴈門人以便騎射給事於武皇爲帳中親
將驍果絕衆善擒生設伏望塵揣敵所向皆捷自武
皇入定三輔誅黃巢每出師皆從唐昭宗乾寧中從
討王行瑜師次渭北遣儼率五百騎護駕石門時京
城大擾士庶奔迸散布南山儼分騎警衛比駕還京
盜賊不作以功授簡較右散騎嘗侍屯三橋者累月
史建塘鴈門人武皇節制鴈門建塘爲九府都督從
入關定京師及鎮太原爲裨將唐僖宗中和四年從
援陳許爲前鋒敗黃巢於汴上追賊至徐兗嘗將騎
挺身酣戰勇冠諸軍是時天下之師雲集軍中無不
推伏

蓋寓蔚州人祖祚父慶世爲州之牙較武皇起雲中
寓與康君立等推轂佐佑之因爲腹心武皇節制鴈
門署職爲都押牙領嵐州刺史洎移鎮太原改左都
押牙簡較左僕射武皇與之決事言無不從凡出征
行靡不衛從唐昭宗乾寧二年從入關討王行瑜特
授簡較太保開國侯邑千戶領容管觀察經畧使光
化初車駕還京授簡較太傅封成陽郡公寓性通黠
多智數善揣人主情武皇性嚴急左右難事無委遇
者小有違忤卽寘於法唯寓承顏希旨規其趣向婉
辭願意以盡參禪武皇或暴怒將吏事將不測寓欲

救止必佯佐其怒以責之武皇怡然釋之有所諫諍
必徵近事以爲喻自武皇鎮撫太原最推親信中外
將吏無不景附朝廷藩隣信使結託先及武皇次入
寓門旣總軍中大柄其名振主梁祖亦使姦人離間
暴揚於天下言蓋寓已代李克用聞者寒心武皇略
無疑問初武皇旣平王行瑜旋師渭北暴雨六十日
諸將或請入覲且云天顏咫尺安得不行覲禮武皇
意未決寓白曰車駕自石門還京寢未安席此爲行
瑜兄弟驚駭乘輿今京師未寧姦宄流議大王移兵
渡渭必恐復動宸情君臣始終不在朝覲但歸藩守

姑務勤王是忠之道也武皇笑曰蓋寓尙阻吾人觀
况下人哉卽日班師

周德威小字楊五朔州馬邑人也初事武皇爲帳中
騎督唐昭宗乾寧中爲鐵林軍使從武皇討王行瑜
以功授簡較左僕射移內衙軍副天復中武皇之師
不利於蒲縣汴將朱友寧氏叔琮來逼晉陽時諸軍
未集城中大恐德威與李嗣昭選募銳兵分出諸門
以攻其壘擒生斬馘汴人枝梧不暇乃退天祐三年
與李嗣昭合燕軍攻潞州降丁會後爲蕃漢都將李
思安之寇潞也德威軍於餘吾時汴人十萬築夾城

圍潞州內外斷絕德威以精騎薄之屢敗汴人進營
高河令遊騎邀其芻牧汴軍閉壁不出乃自東南山
口築埽道樹柵以通夾城德威之騎軍倒牆堙塹日
數十戰首後俘馘不可勝紀梁有驍將黃角鷹房骨
崙皆生致之五年四月命德威班師時莊宗初立德
威外握兵柄頗有浮議內外憂之德威旣至單騎入
謁繇是羣情釋然是月二十四日從莊宗再援潞州
二十九日德威前軍營橫碾距潞四十五里五月朔
晨霧晦暝王師伏於三垂岡下翌日直趨夾城斬關
破壘梁人大敗解潞州之圍初德威與李嗣昭有私

憾武皇臨終顧謂莊宗曰進通忠孝不負我重圍累年似與德威有隙以吾命諭之若不解重圍歿有遺恨莊宗達遺旨德威感泣繇是勵力堅戰竟破彊敵與嗣昭歡愛如初以功加同平章事振武節度使七年岐人攻靈夏遣使來求助德威渡河以應之師還授蕃漢馬步總管十一月汴人據深冀汴將王景仁軍八萬次栢鄉鎮州節度使王鎰來告難帝遣德威率前軍出井陘屯於趙州十二月帝親征二十五日進薄汴營距栢鄉五里營於野河北汴將韓勅率精兵三萬鎧甲皆被繒綺金銀炫曜望之森然我軍懼

形於色德威謂李存璋曰賊結陣而來觀其形勢志不在戰欲以兵甲耀威耳我軍人乍見其來謂其鋒不可當此時不挫其銳吾軍不振矣乃遣存璋諭諸軍曰爾見此賊軍否是汴州天武健兒皆屠沽傭販虛有其表徒被精甲十不當一擒獲足以爲貨德威自率精騎擊其兩偏左馳右決出沒數四是口獲賊一百餘人賊渡河而退德威謂莊宗曰賊驕氣尤盛宐按兵以待其衰莊宗曰我提孤軍救難解紛三鎮烏合之衆利在速戰卿欲持重吾懼其不可使也德威曰鎮定之士長於守城列陣野戰素非便習我師

破賊惟恃騎軍平田廣野易爲施巧今壓賊營令彼見我虛實則勝負未可必也莊宗不悅退臥帳中德威患之謂監軍張承業曰王欲速戰將烏合之徒欲當劇賊所謂不量力也去賊咫尺限此一渠水彼若早夜以略約渡之吾族其爲俘矣若退軍高邑引賊離營彼出則歸彼歸則出復以輕騎掠其芻餉不踰月敗賊必矣承業入言莊宗亦釋然德威得降人問之曰景仁下令造浮橋數百果如德威所料二十七日乃退軍保高邑八年正月二日德威率騎軍致師於栢鄉設伏於村塢間令三百騎以壓汴營王景仁

悉其衆結陣而來德威轉戰而退汴軍因而乘之至於高邑南時步軍未成列德威陳騎河上以抗之亭午兩軍皆陣莊宗問戰時德威曰汴軍氣盛可以逸制勞造次較力殆難與敵古者師行不踰一舍蓋慮糧餉不給士有飢色今賊遠來決戰縱挾糗糒亦不遑食晡晚之後飢渴內侵戰陣外迫士心旣倦將必求退乘其勞弊以生兵制之縱不大敗偏師必喪以臣所籌利在晡晚諸將皆然之時汴軍以魏博之人爲右廣宋汴之人爲左廣自未至申陣勢稍却德威麾軍呼曰汴軍走矣塵埃漲天魏人收軍漸退莊宗

與史建瑋安金全等因衝其陣夾攻之大敗注軍殺戮殆盡王景仁李思安僅以身免獲將較二百八十八人八月劉守光僭稱大燕皇帝十二月遣德威率步騎三萬出飛狐與鎮州將王德明定州將程嚴等軍進討九年正月收涿州降刺史劉知溫五月七日劉守光令驍將單廷珪督精甲萬人出戰德威遇於龍頭岡初廷珪謂左右曰今日擒周楊五旣臨陣見德威廷珪單騎持槍窮追德威垂及德威側身避之廷珪少退德威奮槌擊墜其馬生獲廷珪賊黨大敗斬獲三千級獲大將李山海等五十二人十二日德威

自涿州進軍良鄉大城守光旣失廷珪自是奪氣德威之師屢收諸郡降者相繼十年十一月擒守光父子幽州平十二月授德威簡較侍中幽州盧龍等軍節度使德威性忠孝感武皇獎遇嘗思臨難亡身十二月汴將劉鄩自洹水乘虛將寇太原德威在幽州聞之徑以五百騎馳入土門聞鄩軍至樂平不進德威徑至南宮以候汴軍初劉鄩欲據臨清以扼鎮定轉餉之路行次陳宋口德威遣將擒數十人皆停刃於背繫而遣之旣至謂劉鄩曰周侍中已據宗城矣德威其夜急騎扼臨清劉鄩乃入貝州是時德威若

不至則勝負未可知也十五年我師營麻口渡將大舉以定汴州德威自幽州率本軍至十二月二十三日軍次胡柳詰旦騎報曰汴軍至矣莊宗使問戰備德威奏曰賊倍道而來未成行伍我營柵已固守備有餘既深入賊疆須決萬全之策此去大梁信宿賊之家屬盡在其間人之掌情孰不以家國爲念以我深入之衆抗彼激憤之軍不以方畧制之恐難必勝王但接軍保柵臣以騎軍疲之使彼不得下營際晚糧爨不給進退無據因而乘之勝之道也莊宗曰河上終日挑戰恨不遇賊今款門不戰非壯夫也乃率

親軍成列而出德威不獲已從之謂其子曰吾不知其死所矣莊宗與汴將王彥章接戰大敗之德威之軍在東偏汴之遊軍入我輜重衆駭奔入德威軍因紛擾無行列德威兵少不能解父子俱戰歿是夜收軍德威不至莊宗慟哭謂諸將曰喪吾良將吾之咎也同光初追贈太師

符存審陳州宛丘人初歸武皇署右職令典義兒軍賜姓李存審性謹厚寵遇日隆自是武皇四征存審嘗從所至立功改左右廂步軍都指揮使天祐三年授蕃漢馬步副指揮使與李嗣昭降丁會於上黨從

周德威破賊於夾城以功授忻州刺史領蕃漢馬步都指揮使七年充漢副總管莊宗擊汴人於柘鄉留存審守太原九年梁祖攻菑縣存審與史建瑋李嗣昭赴援屯下博橋汴人驚亂燒營而遁以功遙領邢洛磁團練使十二年魏博歸款於莊宗莊宗遣存審率前鋒據臨清以俟進取莊宗入魏存審屯魏縣以抗劉鄩十二年六月鄩營莘縣存審與鎮定之師營莘西三十里一日數戰八月率師攻張源德於貝州十三年二月劉鄩自莘悉衆來襲我魏州存審以大軍踵其後戰於故元城大敗汴人從收澶衛磁洛等

州秋邢州閻寶降授存審安國軍節度使邢洛磁等州觀察使十月戴思遠棄滄州毛璋以城降授存審橫海軍節度使兼領魏博馬步軍都指揮使明年就加平章事十四年八月將兵援周德威於幽州敗契丹之衆冬破汴將安彥之於楊劉諸軍進營麻口時梁將謝彥章營行臺村莊宗勇於接戰每以輕騎當之遇窘者數四存審每俟其出必叩馬泣諫曰王將復唐宗社宐爲天下自愛奉於挑戰一劒之任無益聖德請責效於臣古人不以賊遺君父臣雖不武敢不代君之憂莊宗卽時廻駕十二月戰於胡柳疇時

之後存審引所部銀槍效節軍敗梁軍於土山下是日辰巳間周德威歿一軍逗曉梁軍四集存審與其子彥圖冒刃血戰出沒賊陣與莊宗軍合午後師復集擊敗汴人十六年春爲內外蕃漢馬步總管於德勝口築南北城以據之七月汴將王瓚自黎陽渡河寇澶州存審拒戰瓚退營於楊村渡控我上游自是日與交鋒對壘經年大小凡百餘戰十七年汴將劉鄩攻同州朱友謙求援於我遣存審與李嗣昭將兵赴之九月次河中進營朝邑時河中久臣於梁衷持兩端及諸軍大集芻粟暴貴嗣昭懼其翻覆將急戰

以定勝負居旬日梁軍逼我營會望氣者言西南有黑氣如鬪雞之狀當有戰陣存審曰我方欲決戰而形於氣象得非天贊歟是夜閱其衆詰旦進軍梁軍來逆戰大敗之追斬二千餘級自是梁軍保壘不出存審謂嗣昭曰吾初懼劉鄩據渭河偏師旣敗彼若退歸懼我踵之獸窮持人勿謂無事可開其歸路然後追奔乃令王建及收馬於沙苑劉鄩尹皓知之保衆退去遂解同州之圍存審略地至奉先謁諸帝陵乃班師十八年王師討張文禮於鎮州李嗣昭李存進相次戰歿十九年遣存審率師進攻師於城下文

禮之將李再豐陰送款於存審我師中夜登城擒文禮之子處球等露布以獻鎮州平以功加簡較太傅兼侍中二十年正月師旋於魏州莊宗出城迎勞就第宴樂居無何契丹犯燕薊郭崇韜奏曰汴寇未平李繼韜背叛北邊遮虜非存審不可帝遣中使諭之存審臥病羸瘠附奏曰臣効忠稟命靡敢爲辭但病恙纏綿不堪抵役旣而詔存審以本官充幽州盧龍節度自鎮州之任同光初加開府儀同三司簡較太師中書令邑千戶賜號忠烈扶天啓運功臣郭崇韜代州鴈門人也武皇用爲典謁奉使鳳翔稱

旨署教練使崇韜臨事機警應對可觀莊宗嗣位尤器重之天祐十四年用爲中門副使專典機務艱難戰伐靡所不從十八年從征張文禮於鎮州契丹引衆至新樂王師大恐諸將咸請退還魏州莊宗猶豫未決崇韜曰阿保機爲王郁所誘本利貨財非敦隣好苟前鋒小衄遁走必矣况我新破汴寇威振北蕃乘此驅攘往無不捷且事之濟否亦有天命莊宗從之王師果捷莊宗卽位於魏州崇韜加簡較太保守兵部尚書充樞密使是時衛州陷於梁澶相之間寇鈔日至民流地削軍儲不給羣情惘惘以爲霸業終

不能濟崇韜寢不安席俄而王彥章陷德勝南城敵勢滋蔓汴人急攻楊劉城明宗在鄆音驛斷絕莊宗登城四望計無從出崇韜啓曰段凝阻絕津路苟王師不南鄆州安能保守臣請於博州東岸立柵以固通津但慮汴人偵知徑來薄我請陛下募敢死之士日以挑戰如三四日間賊軍未至則柵壘成矣崇韜率毛璋等萬人夜趨博州視矛戟之端有光崇韜曰吾聞火出兵刃破賊之兆也至博州渡河版築晝夜不息崇韜于葭葦間據胡牀假寐覺袴中冷令左右視之乃蛇也其忘疲勵力也如是居三日梁軍果至

城壘低痺沙土散惡戰具不完汴將王彥章杜晏球率衆攻擊軍不得休息崇韜身先督衆四面拒戰有急卽應城垂陷俄報莊宗領親軍次西岸梁軍聞之退走因解楊劉之圍未幾汴將康延孝來奔崇韜延于臥內訊其軍機延孝曰汴人將四道齊舉以困我軍莊宗憂之召諸將謀進取之策宣徽使李紹宏請棄鄆州與汴人盟以河爲界無相侵寇莊宗不悅獨臥帳中召崇韜謂曰計將安出對曰臣不知書不能徵比前古請以時事言之且陛下十五年起義圖霸爲雪家讐國恥甲冑生蟣虱黎人困輸輓今旣纂大

號河朔士庶日望盪平纔得汝陽尺寸之地不能保
守况盡有中原乎將來歲賦不充物議咨怨設若割
河爲界誰爲陛下守之臣自延孝言事已來晝夜籌
度料我兵力筭賊事機不出今年雌雄必決聞汴人
決河自滑至鄆非舟楫不能濟又聞精兵盡在段凝
麾下王彥章日寇鄆境彼旣以大軍臨我南鄙又憑
恃決河謂我不能南渡志在收復汝陽此汴人之謀
也臣謂段凝保據河壩苟欲持我臣但請留兵守鄴
保固楊劉陛下親御六軍長驅倍道直指大梁汴城
無兵望風自潰旣若僞主授首賊將自然倒戈半月

之聞天下必定如不決此計傍採浮譚臣恐不能濟
也今歲秋稼不登軍糧纔支數月決則成敗未知不
決則坐見不濟臣聞作舍道邊三年不成帝王應運
必有天命成敗天也在陛下獨斷莊宗蹶然而興日
正合吾意大丈夫得則爲王失則爲虜行計決矣卽
日下令軍中家口竝還魏州莊宗送劉皇后興聖宮
使繼岌至朝城西野亭泣別日事勢危蹶今須一決
事苟不濟無復相見乃留李紹宏及租庸使張憲守
魏州大軍自楊劉濟河是歲擒王彥章誅梁氏降段
凝皆崇韜贊成其謀也

安金全代北人世爲邊將少驍果便騎射武皇時爲
騎將屢從征伐莊宗之救潞州及平河朔皆有戰功
累爲刺史

安審通金全之猶子也幼事莊宗累有戰功轉先鋒
指揮使同光初爲北京右廂馬軍都指揮使屯奉化
軍四年春赴明宗急召軍趨夷門爲前鋒天成初授
單州刺史改齊州防禦使兼諸道先鋒馬軍都指揮
使

安元信字子言代北人元信以將家子便騎射幼事
武皇從平巢蔡唐僖宗光啓中吐渾赫連鐸寇雲州

武皇使元信拒之信兵敗於居庸關武皇性嚴急元
信不敢還遂奔定州王處存待之甚厚用爲突騎都
較昭宗乾寧中處存卒子郜嗣時梁軍攻河朔三鎮
奔命不暇梁將張存敬軍奄至城下旣無宿備郜懼
挈其族奔太原元信從之武皇待之如初用爲鐵林
軍使梁將氏叔琮之攻河東也別將葛從周自馬嶺
入元信伏于榆次挫其前鋒梁將李思安之攻上黨
也王師將壁高河爲梁軍所逼別將秦武者尤爲難
敵元信與鬪斃之繇是梁軍解去城壘得立武皇賜
所乘馬及細鎧仗遷突騎都將莊宗嗣晉王位元信

從救上黨破夾寨復澤潞以功授簡較司空遼州刺史賜玉鞍名馬栢鄉之役日晚戰酷元信重傷莊宗自臨傅藥其年改授簡較司徒武州刺史充內衙副都指揮使山北諸州都團練副使從莊宗定魏博移爲州刺史與梁軍對壘得勝渡元信爲右廂排陣使未幾爲大同軍節度使

劉訓字遵範隰州永和人也出身行間初事武皇爲馬軍隊長漸至散將屬河中王氏昆仲有尋戈之役訓從史儼攻陝州武皇討王行瑜以訓爲前鋒後隸河中爲隰州守禦都將居無何殺刺史以郡歸莊宗

歷瀛州刺史

劉彥琮字比德雲中人也事武皇累從征役先是絳州刺史王瓘叛武皇言於彥琮意欲致之無幾從畋於汾晉之郊彥琮奔絳瓘以爲附已待之甚厚因命爲親騎會瓘出獵於驅馳之際彥琮刃瓘之首來獻武皇甚奇之

袁建豐自武皇破黃巢時得於華陰年方九歲愛其精神爽俊俾收養之漸長列於左右復習騎射補鐵林都虞侯從破邠州王行瑜以功遷左親騎軍使轉突騎指揮使從莊宗解圍上黨破栢鄉陣累功加右

僕射左廂馬軍指揮使明宗爲內衙指揮使建豐爲副北討劉守光嘗身先士伍轉都教練使權蕃漢副總管莊宗入鄴以心腹幹能選爲魏府都巡簡使破劉鄩下衛磁洛三郡有功加簡較司空授洛州刺史於臨洛西敗梁將王遷數千人生獲將領七十餘人俄拜相州刺史徵赴河上預戰於柳陂建豐領相州軍士行營在外委州事於小人失於撫馭指揮使孟守謙據城以叛建豐引兵討平之改隰州刺史夏魯奇字邦傑青州人也初事宣武軍爲軍較與主將不協遂歸於莊宗以爲護衙指揮從周德威攻幽

州燕將有單廷珪元行欽時稱驍勇魯奇與之鬪兩不能解將士皆釋兵從觀幽州平魯奇功居多梁將劉鄩在洹水莊宗深入致師鄩設伏於魏縣西南葭蘆中莊宗不滿千騎汴人伏兵萬餘大譟而起圍莊宗數重魯奇遂與王門關烏德兒等奪命決戰自午至中俄而李存審兵至方解魯奇持槍攜劍獨衛莊宗手殺百餘人烏德兒等被擒魯奇傷痍徧體自是莊宗尤憐之歷磁州刺史中都之戰汴人大敗魯奇見王彥章識之單馬追及槍擬其頸彥章顧曰爾非余故人乎卽擒之以獻莊宗壯之賞絹千疋梁平授

鄭州防禦使四年授河陽節度

張廷裕代北人也幼事武皇於雲中從平黃巢討王
行瑜自行間漸昇爲小將莊宗定魏補天雄軍左廂
馬步都虞侯歷蔚慈隰三州刺史


康義誠字信臣代北三部落人也少以騎射事武皇
從莊宗入魏博補突騎軍使累遷本軍都指揮使
索自通字得之太原清源人也自通少能騎射嘗於
山墅射獵莊宗鎮太原時遇之於野訊其姓名卽補
右番廳直軍使後因從獵射中走鹿轉指揮使佐周
德威攻燕軍於涿州擒燕將郭在均從莊宗定魏博

改突騎指揮使明宗卽位自隨駕左右廂馬軍都指
揮使授忻州刺史歲餘召還後與禁兵領韶州刺史
漢史弘肇鄭州滎澤人也弘肇少游俠無行拳勇健
步日行三百里走及奔馬梁末每七戶出一兵弘肇
在籍中後隸本州開道都入禁軍嘗在晉祖麾下遂
留爲親從及踐祚用爲控鶴偏將高祖鎮太原奏請
從行用爲牙隊大將後起置武節左右指揮以弘肇
爲都將代州王暉叛以城歸契丹弘肇征之身先士
卒一鼓而拔加簡較太保領雷州刺史漢國建王守
恩以上黨來附虜主命大將耿崇美率衆上太行欲

取上黨高祖命弘肇率軍應接守恩軍至潞州契丹退去翟令奇以澤州迎降會河陽武行德遣人迎弘肇遂率衆南下與行德合故高祖繇蒲陝赴雒如歸弘肇前鋒之功也

周何福進漢高祖乾祐中爲曹州防禦使時太祖出鎮於鄴將謀北伐奏以福進自隨及太祖入平內難以輔佐功拜忠武軍節度使

冊府元龜



取上黨高

是去歷今

肇遂率衆

弘肇前鋒之功也

周何福進漢高祖乾祐中為滑州防禦使時太祖因
夢於鄴將謀北伐奏以福進自隨及太祖入平內難
以輔佐功拜忠武軍節度使

冊何元龜

